

Pareha Real a disfruta di un tremendo competencia di bela

Reina Maxima a duna inicio na e careda



Diabierna Rey Willem Alexander y Reina Maxima por a disfruta di diferente actividad durante e evento di Sail Aruba 2015, un di nan tabata e competencia di nabegacion di bela.

Erick Meits, presente durante e evento aki a duna di conoce cu por a mira cu e pareha real tin un pasion pa botonan di bela y a sinti nan mes involucra durante e evento aki. Reina Maxima tabata esun cu a duna inicio na e compe-

tencia di e Fundacion Youth Watersports Aruba. Ta trata aki di un organisacion cu ta stimula nabegacion di bela na Aruba dirigi specialmente riba nos muchanan di entre 8 pa 12 aña cu por pasa despues pa Beach Kids cu ta un organisacion principalmente di boluntario cu ta encarga di mantene e deporte di nabegacion di bela bibo na Aruba. Algo cu el a remarca ta cu e reina por a nota di biahá kendenan ta e bon nabegantenan di e botonan, cual a klop

completamente tambe.

Robert Jan Moons, Presidente di e federacion di Aruba Sailing Association a duna di conoce cu tabata algo sumamente emocionante di por a mira e pareha real presente na e actividad di deporte di bela. El a bisa cu e pareha ta uno masha amabel y tabatin hopi interes den lo cual ta pasando den mundo di bela na Aruba, particularmente den area di hubentud. Sr. Moons a bisa cu e pareha

real mes gusta e deporte y rey a menciona cu tempo cu e tabata hoben tambe e tabata practica e deporte aki, entre otro. Ta trata di un deporte cu den tur parti di Reino ta wordo practica na un nivel basta halto. Hulanda tin un team olimpico di bela y tin diferente medaya, Corsou y Boneiro tambe tin teamnan di bela grandi, mientras cu Sint Maarten ta un teritorio cu masha hopi bela y awor na Aruba tambe bela ta lantando. E muchanan cu a participa

den e competencia diabierna ta muchanan cu tin un poco experiencia caba, nan tin nan prome di tres diploma di bela caba y ademas conoce e reglanan di un careda.

Por a wak riba cara di nos reina cu e tabata hopi contento y manera a wordo bisa anteriormente, e manera cu el a involucra su mes siguiendo e competencia te na su ultimo detaye y reparando e bon nabegantenan y con e muchanan cu strategia por a yega na e meta. □

